

NEZAVISNA BOSANSKOHERCEGOVAČKA LISTA

NBL

POVELJA
NEZAVISNE BOSANSKOHERCEGOVAČKE LISTE

Sarajevo, 30. septembar 2017.

Svjesni moralne i političke odgovornosti prema sadašnjoj agoniji bosanskohercegovačkog društva i njegove države;

Uvjereni da nijedan čovjek kojem bosanskohercegovačko društvo i njegova država pripadaju, ne smije ostati ravnodušan prema sadašnjem stanju;

Znajući da to neprihvatljivo stanje može i mora biti izmijenjeno političkim, kulturnim i ekonomskim djelovanjima pojedinaca i organizacija;

Tvrdeći da je bosanskohercegovačka država najveće dobro njenih ljudi te da zato mora biti u službi vladavine zakona, šticeanja nepovredivosti dostojanstva pojedinaca i njihovih prava i sloboda;

Smatrajući da je bosanskohercegovačka država danas u velikoj mjeri blokirana nesposobnošću i neodgovornošću u postojećim političkim djelovanjima;

Saglasni da su bosanskohercegovačkom društvu i njegovoj državi, s ciljem njihovog oslobođenja od sadašnjih zapriječenosti, hitno potrebne nove vizije i na njima osnovana politička, kulturna i ekonomska organiziranja;

Mi, općinski načelnici, izabrani na lokalnim izborima 2016. godine, zajedno s drugim osnivačima *NEZAVISNE BOSANSKOHERCEGOVAČKE LISTE* 30. septembra 2017. godine u Sarajevu usvojili smo dokument

POVELJA

NEZAVISNE BOSANSKOHERCEGOVAČKE LISTE

Pozivamo sve pojedince, organizacije i ustanove u bosanskohercegovačkoj državi da odlučnim političkim, kulturnim i ekonomskim djelovanjem otklonimo sadašnje stanje razbijenosti i blokade bosanskohercegovačkog društva i njegove države. Samo otklanjanjem tog stanja moguće je ljude osloboditi sada vladajućeg straha za budućnost i otvoriti im puteve povjerenja u domišljanje i djelovanje u skladu s najboljim svjetskim praksama. A to je potrebno za promjenu političkih, kulturnih i ekonomskih prilika bosanskohercegovačkog društva i njegove države. Jedino takvim promjenama moguće je zaustaviti sadašnje tokove propadanja i beznađa u većini bosanskohercegovačkog naroda.

Mi, članovi i vodstvo *NEZAVISNE BOSANSKOHERCEGOVAČKE LISTE*, javno izražavamo spremnost i odlučnost da zagovaramo promjene sadašnjeg političkog, kulturnog i ekonomskog stanja u državi. Takvu odluku donosimo u skladu s najboljim interesom bosanskohercegovačkog naroda. Spremni smo raditi za takvo opredjeljenje.

Uraspoloživim prirodnim i drugim resursima bosanskohercegovačke države, u njenom geopolitičkom položaju, u graditeljskim sposobnostima njenih ljudi, u njihovom historijskom iskustvu postoje sve pretpostavke da sada vladajuća politička, kulturna i ekonomska agonija bude poražena. Tako bi bosanskohercegovačko društvo i njegova država bili usmjereni poželjnom razvoju koji mora biti građen kao alternativa sadašnjoj blokadi. Samo u organiziranom političkom, kulturnom i ekonomskom djelovanju moguće je otkloniti sadašnju sramotu i grehotu siromaštva, nepravde, korumpiranosti i nesigurnosti proširenim u bosanskohercegovačkoj državi. Odlučni da se takvom stanju suprotstavimo novom vizijom i radom za njeno ostvarenje, pozivamo sve bosanskohercegovačke ljude da nam se pridruže u tom velikom političkom, kulturnom i ekonomskom projektu.

Mi, članovi i vodstvo *NEZAVISNE BOSANSKOHERCEGOVAČKE LISTE*, javno izražavamo spremnost i odlučnost da zagovaramo promjene sadašnjeg političkog, kulturnog i ekonomskog stanja u državi. Takvu odluku donosimo u skladu s najboljim interesom bosanskohercegovačkog naroda. Spremni smo raditi za takvo opredjeljenje.

Pred svim bosanskohercegovačkim ljudima neodloživa je obaveza da preuzmu odgovornost za svoje sadašnje stanje i njegovu promjenu. Svi koji hoće promjenu ovog nepodnošljivog stanja moraju priznati nužnost vraćanja pojedinačnog čovjeka u središte svakog djelovanja. Moraju to učiniti, jer samo je pojedinačni čovjek mjera svake politike. Valja znati da nema općenitih i apstraktnih ljudskih patnji. Poniženost, obespravljenost, ugroženost i prestravljenost uvijek su u konkretnome čovjeku, pojedincu. Takva se stanja ne liječe velikim obećanjima. Vladajuća bosanskohercegovačka politička oligarhija zanemarila je i gotovo posve zaboravila odgovornost za konkretnog bosanskohercegovačkog čovjeka. Isključila ga je iz svog vidokruga. Velikim obećanjima, koja ne ispunjava, ta ga oligarhija vara i uspavljuje u njegovim životnim nevoljama. Takva politika je obuzeta sobom i najprizemnijim interesima svojih protagonista. Da takvo stanje bude promijenjeno, potrebna su nova viđenja i djelovanja. Pozivamo bosanskohercegovačke ljude da nam se pridruže u suprotstavljanju sadašnjem stanju, kako bismo sami radili na onoj budućnosti koja priliči našim pravima i slobodama. Samo u takvome radu za bosanskohercegovačku budućnost moguće je otkloniti sada vladajuće bolesti u političkom, kulturnom i ekonomskom djelovanju a otvoriti nove vidike demokratskog legitimiranja vlasti, šticeanja ljudskih prava, vladavine zakona i branjenja ljudskog dostojanstva.

Mi, članovi i vodstvo *NEZAVISNE BOSANSKOHERCEGOVAČKE LISTE*, javno izražavamo spremnost i odlučnost da zagovaramo promjene sadašnjeg političkog, kulturnog i ekonomskog stanja u državi. Takvu odluku donosimo u skladu s najboljim interesom bosanskohercegovačkog naroda. Spremni smo raditi za takvo opredjeljenje.

Posvuda u našoj zemlji čuje se tvrdnja: bosanskohercegovačkom društvu i njegovoj državi navučena je luđačka košulja, pa su nemoćni da djeluju u skladu sa životnim potrebama konkretnog čovjeka. Kada bi to i bilo tačno, to nikoga ne amnestira da djeluje na otklanjanju postojećeg stanja siromaštva, nepravde, korupcije, neefikasne administracije na svim nivoima i tome sličnih pojava u politici, kulturi i ekonomiji. Uporedo s teškim i širećim nevoljama bosanskohercegovačkih ljudi kartelski organizirana politička oligarhija nemoralna je i neodgovorna u odnosu prema javnim finansijama. Ostvaruje privilegije kakve joj ne bi pripadale čak ni u uvjetima da bosanskohercegovačko društvo i njegova država danas nisu tu gdje jesu. A gotovo u svemu su na začelju liste država članica Organizacije Ujedinjenih naroda. Takvo stanje ničim nije opravdivo. Moralna je obaveza svakog pojedinca da mu se suprotstavi.

Mi, članovi i vodstvo *NEZAVISNE BOSANSKOHERCEGOVAČKE LISTE*, javno izražavamo spremnost i odlučnost da zagovaramo promjene sadašnjeg političkog, kulturnog i ekonomskog stanja u državi. Takvu odluku donosimo u skladu s najboljim interesom bosanskohercegovačkog naroda. Spremni smo raditi za takvo opredjeljenje.

O neprihvatljivome stanju bosanskohercegovačkog društva i njegove države neosporivo svjedoče tri očite činjenice. Prvo, siromaštvo većine bosanskohercegovačkih ljudi, koje je i sramota i grehota, među nama je, nasuprot svim pretpostavkama da ga u ovoj državi nikad ne bude. Drugo, osjećanje političke, kulturne i ekonomske nesigurnosti te stalno slabljenje društvenog povjerenja sa snaženjem psihologije besperspektivnosti podstiču i pokreću najvitalniji dio bosanskohercegovačkog stanovništva da egzistencijalna rješenja traži u iseljavanju. A ljudi zapravo bježe od nemoralnih sadržaja politike, kulture i ekonomije u svojoj zemlji. I treće, hobotnica užasavajuće korumpirane i neefikasne administracije na svim razinama državnog poretka onemogućuje pojedince, skupine i organizacije u ispunjavanju njihovih moralnih obaveza. A upravo ih to sprječava da svoje društvo i državu grade i štite u funkciji svojih najboljih interesa. Sve to odražava se u nebrizi za socijalno ugrožene dijelove stanovništva, nebrizi za razvijanje obrazovnog sistema u skladu s kriterijima naprednoga svijeta, nebrizi za održavanje i snaženje slike bosanskohercegovačkog društva kao modela društvene pluralnosti, nebrizi za dostojnu zdravstvenu zaštitu i neosporiva penzijska prava i tome slično. Takvo stanje može i mora biti promijenjeno, ali ne očekivanjem tuđih milostinja i imaginarnih ideologijskih prijatelja i njihovih obećanja. Ono može i mora biti promijenjeno

novim djelovanjem bosanskohercegovačkih ljudi. Ovo je neopoziv zahtjev svima nama da takvu promjenu otpočnemo, te ustrajno vodimo i snažimo.

Mi, članovi i vodstvo *NEZAVISNE BOSANSKOHERCEGOVAČKE LISTE*, javno izražavamo spremnost i odlučnost da zagovaramo promjene sadašnjeg političkog, kulturnog i ekonomskog stanja u državi. Takvu odluku donosimo u skladu s najboljim interesom bosanskohercegovačkog naroda. Spremni smo raditi za takvo opredjeljenje.

I skustva bosanskohercegovačkih ljudi nastala u dugim razdobljima tuđih ideologijskih i totalitarnih vladavina uzrokovala su mentalitete straha, snishodljivosti, potkupljivosti i pasivnosti. Te tuđinske vlasti snažile su takve mentalitete i koristile ih kao sredstvo potčinjavanja ljudi. U takvim mentalitetima politička, kulturna i ekonomska rješenja se očekuju od drugih. U skladu s time, bosanskohercegovački ljudi za svoje muke uglavnom i okrivljuju druge. Za sve privilegije nezakonito dodjeljivane pojedincima i grupama tuđe vlasti zahtijevale su potpunu lojalnost. A danas to isto traže domaće, pseudodemokratske oligarhije. Sada, kada za bosanskohercegovačko društvo i njegovu državu odgovornost snose prvenstveno njihovi ljudi, oslobađanje od spomenutog mentaliteta neodložna je zadaća. A to je moguće jedino u gradnji nove vizije bosanskohercegovačke budućnosti kojoj će suština biti dostojanstvo i sloboda pojedinca. Svi organizacijski oblici države i sva politika moraju služiti upravo tome.

Takva vizija budućnosti bit će, nema sumnje, uvjerljiva, privlačna i prihvatljiva svima. Tek kad budu svjesni svoje odgovornosti za takvu budućnost, kad za nju budu radili tu gdje jesu u svojoj konkretnosti, bosanskohercegovački ljudi u različitim oblicima političkih organiziranosti postat će relevantni i pouzdani partneri subjektima međunarodnog političkog, kulturnog i ekonomskog poretka. Za uspostavljanje takve bosanskohercegovačke subjektivnosti gotovo da nema nade u sadašnjim političkim, kulturnim i ekonomskim nedorečenostima i varanjima. Nužno je vratiti bosanskohercegovačkim ljudima nadu u onu budućnost koju će smatrati svojim dobrom, pa zato za nju i raditi. A to znači nužno je najspособnijim bosanskohercegovačkim ljudima osigurati perspektive poduzetničkog djelovanja i razvoja u svim područjima života. Upravo je to suština ovog poziva na novo političko djelovanje.

Mi, članovi i vodstvo *NEZAVISNE BOSANSKOHERCEGOVAČKE LISTE*, javno izražavamo spremnost i odlučnost da zagovaramo promjene sadašnjeg političkog, kulturnog i ekonomskog stanja u državi. Takvu odluku donosimo u skladu s najboljim interesom bosanskohercegovačkog naroda. Spremni smo raditi za takvo opredjeljenje.

Z a izlazak iz postojećeg stanja bosanskohercegovačkog društva i njegove države potrebno je temeljito kritičko preispitivanje svih sadržaja dosadašnjih politika. To mora postati najvažniji sadržaj bosanskohercegovačke javnosti. Naime, izgrađene su i nametnute maske kolektivnih autoriteta političkih i drugih organizacija. Iza njih se kriju, kako se to jasno vidi, političke hulje i kukavice koji ne mare za patnje naroda na koji se pozivaju. Bosanskohercegovačkim ljudima – koji imaju neosporiva prava na zaštitu pojedinačnih i kolektivnih dostojanstava, prava na pošteni stjecanja dobara, prava na jednakost pred sudovima i pravedna presuđivanja, prava na slobodan pristup obrazovanju, zdravstvenoj i penzijskoj zaštiti, prava na zasnivanje i razvoj privatnog poduzetništva, prava na nepovredivost svih oblika imovine i privatnosti, prava na udruživanja i kritičko preispitivanje svega što ih se tiče, prava na državnu administraciju koja im služi a ne administraciju koja njima vlada, prava na pravednu raspodjelu javnih dobara – potrebni su u političkom predstavljanju hrabri i prepoznatljivi pojedinci. Takvi pojedinci neće se kriti iza maski ustanova, organa i organizacija. Takvi pojedinci moraju biti spremni da stanu otvoreno pred one koji ih biraju, koji im osiguravaju plate za javne poslove. Takvi pojedinci moraju pristati na to da za sve što obećaju i rade polažu račun javnosti.

Mi, članovi i vodstvo *NEZAVISNE BOSANSKOHERCEGOVAČKE LISTE*, javno izražavamo spremnost i odlučnost da zagovaramo promjene sadašnjeg političkog, kulturnog i ekonomskog stanja u državi. Takvu odluku donosimo u skladu s najboljim interesom bosanskohercegovačkog naroda. Spremni smo raditi za takvo opredjeljenje.